

HS Orka hf. - Ársreikningur 2008

Ársreikningur HS Orku hf., áður Hitaveitu Suðurnesja hf., var samþykktur á fundi stjórnar í dag, 13. mars 2009.

Í maí 2008 voru samþykkt á Alþingi lög á auðlinda- og orkusviði. Samkvæmt lögunum ber félaginu meðal annars að aðskilja formlega í sérstökum félögum einkaleyfisstarfsemi félagsins og samkeppnisstarfsemi. Samkeppnisstarfsemi er framleiðsla og sala á raforku. Í samræmi við það var Hitaveitu Suðurnesja hf. skipt í tvö félög HS Orku hf. og HS veitur hf., sem tók yfir einkaleyfisstarfsemi Hitaveitu Suðurnesja hf. Á hluthafafundi þann 1. desember 2008 var skiptingaráætlun félagsins samþykkt. Lögformlega miðar skipting Hitaveitu Suðurnesja hf. við 1. júlí 2008. Bókhaldslegum og stjórnunarlegum aðskilnaði félagsins lauk hins vegar ekki fyrr en 31. desember 2008 og miðast reikningshaldsleg skipting félagsins við þann dag.

Í lögformlegum skiptingarefnahagsreikningi eru eignir og skuldir sem tilheyra einkaleyfisstarfsemi félagsins færðar yfir í HS veitur hf. Eiginfjárhlutfall Hitaveitu Suðurnesja hf. var fyrir skiptingu 1. júlí 2008 54,3%, en eftir skiptingu var eiginfjárhlutfall HS Orku hf. 45,2% og hjá HS veitum hf. 56,7%.

Reikningshaldsleg skipting félagsins er miðuð við 31. desember 2008. Eignir og skuldir HS veitna hf. eru færðar út úr efnahagsreikningi HS Orku hf. í árslok 2008. Rekstur og efnahagur HS veitna hf. er sérgreindur í ársreikningi HS Orku hf. sem aflögð starfsemi. Eiginfjárhlutfall HS veitna hf. í lok árs var 51,9%.

Helstu fjárhæðir úr ársreikningnum eru sem hér segir í þús. kr.

Rekstrarreikningur	2008	2007	2006	2005
	*	*	**	**
Rekstrartekjur	5.424.774	4.192.141	5.882.045	4.293.009
Aðrar tekjur	0	311.399	14.648	388.519
Rekstrargjöld án afskrifta	(2.642.144)	(2.069.262)	(2.852.853)	(2.440.041)
Rekstrarhagnaður fyrir afskriftir	2.782.630	2.434.278	3.043.840	2.241.487
Afskriftir	(800.329)	(845.565)	(991.367)	(670.016)
Rekstrarhagnaður fyrir fjármagnsliði	1.982.301	1.588.713	2.052.473	1.571.471
Fjármunatekjur og fjármagnsgjöld	(15.516.242)	1.329.736	10.912	4.381
Hlutdeild í afkomu hlutdeildarfélags	(264.308)	(63.359)	(92.533)	0
(Tap) hagnaður fyrir tekjuskatt	(13.798.249)	2.855.090	1.970.852	1.575.852
Tekjuskattur	1.954.744	(520.046)	906.528	0
(Tap) hagnaður af áframhaldandi starfsemi	(11.843.505)	2.335.044	2.877.380	1.575.852
Afkoma aflagðrar starfsemi	161.886	1.145.029	0	0
(Tap) hagnaður	(11.681.619)	3.480.073	2.877.380	1.575.852
Efnahagsreikningur	31.12.2008	31.12.2007	31.12.2006	31.12.2005
Fastafjármunir	33.590.620	34.882.045	29.978.378	22.700.041
Veltufjármunir	2.888.366	1.908.223	2.354.508	1.933.326
Eignir samtals	36.478.986	36.790.268	32.332.886	24.633.367
Eigið fé	5.934.251	19.976.138	16.896.065	13.771.251
Langtímaskuldir	23.201.594	13.386.066	13.518.268	8.122.073
Skammtímaskuldir	7.343.141	3.428.064	1.918.553	2.740.043
Skuldir og eigið fé samtals	36.478.986	36.790.268	32.332.886	24.633.367
Kennitölur				
Veltufjárhlutfall	0,39	0,56	1,23	0,71
Eiginfjárhlutfall	0,16	0,54	0,52	0,56

* Aflögð starfsemi er sérgreind í rekstrarupplýsingum árána 2008 og 2007

** Aflögð starfsemi er ekki sérgreind í rekstrarupplýsingum árána 2006 og 2005

Samkvæmt rekstrarreikningi námu rekstrartekjur HS Orku hf. á árinu 5.425 millj. kr., en voru 4.192 millj. kr. árið áður. Hækkun rekstrartekna nemur 29% eða 1.233 millj. kr. Hækkun tekna skýrist að miklu leyti af auknum tekjum af sölu á raforku til stóriðju vegna hækkandi álverðs framan af ári og gengisþróunar íslensku krónunnar auk áhrifa af Orkuveri 6 sem tekið var í notkun undir lok ársins 2007 og er árið 2008 fyrsta heila árið sem það er í rekstri.

Aðrar tekjur lækka um 311 millj. kr. frá árinu áður. Lækkun skýrist að mestu leyti af því að á árinu 2007 var færð eingreiðsla frá Bandaríkjastjórn vegna brotthvarfs varnarliðsins.

Tap félagsins á árinu 2008 nam 11.682 millj. kr. þar af var tap áframhaldandi starfsemi 11.844 millj. kr. Árið 2007 var hagnaður af rekstri félagsins 3.480 millj. kr., þar af 2.335 millj. kr. af áframhaldandi starfsemi. Meginhluti taps ársins 2008 er vegna hreinna fjármagnsgjalda að fjárhæð 15.516 millj. kr. sem samanstendur af 10.408 millj. kr. gengistapi og 4.582 millj. kr. tapi afleiðusamninga.

Rekstrargjöld án afskrifta námu 2.642 millj. kr., en voru 2.069 millj. kr. árið áður. Hækkun rekstrargjalda er að mestu tilkomin vegna hækkana á kostnaði við framleiðslu og sölu raforku sem tengist aukinni sölu á árinu 2008 auk hækkunar lífeyrisskuldbindingar.

Hrein fjármagnsgjöld voru 15.516 millj. kr. á árinu 2008 samanborið við hreinar fjármunatekjur 1.330 millj. kr. árið áður. Veiking íslensku krónunnar gagnvart erlendum gjaldmiðlum leiddi til 10.408 millj. kr. gengistaps, en árið áður nam gengishagnaður 922 millj. kr. Vaxtagjöld hækka frá árinu áður um 540 millj. kr. eða úr 497 millj. kr. í 1.037 millj. kr. sökum aukinna lántaka og skammtímafjármögnunar auk áhrifa gengisþróunar íslensku krónunnar. Eignfærður fjármagnskostnaður nam 34 millj. kr. samanborið við 40 millj. árið áður. Gjöld vegna gangvirðisbreytinga afleiðusamninga námu 4.582 millj. kr. á árinu samanborið við tekjur upp á 827 millj. kr. árið áður.

Samkvæmt efnahagsreikningi eru eignir HS Orku hf. í árslok 2008 bókfærðar á 36.479 millj. kr. Eignir lækkuðu um 311 millj. kr. frá ársbyrjun. Á árinu voru virkjanir, dreifikerfi og fasteignir metnar til gangvirðis til samræmis við ákvæði IAS 16. Endurmat rekstrarfjármuna sem fært er til hækkunar á eigin fé nam 8.945 millj. kr. (7.732 millj. kr. að teknu tilliti til tekjuskattsáhrifa). Gangvirði innbyggðra afleiða lækkaði um 2.687 millj. kr. Fjárfesting ársins í rekstrarfjámunum nam um 6.334 millj. kr. og skuldabréfum 3.848 millj. kr. Meðtalið í fjárfestingu ársins er fjárfesting í nýtingarrétti á vatnslögn til Vestmannaeyja 555 millj. kr. sem móttækinn var á móti afhendingu hennar. Við skiptingu fluttust út úr félaginu eignir að bókfærðu virði 16.936 millj. kr.

Skuldir HS Orku hf. nema 30.545 millj. kr. samkvæmt efnahagsreikningi, þar af eru skammtímaskuldir 7.343 millj. kr. Skuldir hafa hækkað um 13.731 millj. kr. frá ársbyrjun 2008. Af því nemur hækkun langtímaskulda og skuldbindinga 9.816 millj. kr. Hækkun langtímaskulda skýrist að mestu leyti af gengisþróun íslensku krónunnar en stærstur hluti vaxtaberandi langtímaskulda félagsins er í erlendum myntum. Skammtímaskuldir hækka um 3.915 millj. kr. Hækkunin skýrist að mestu leyti af gangvirðisbreytingu afleiðusamninga, auknum vaxtaberandi skammtímalántökum auk hækkunar ógreidds framkvæmdakostnaðar.

Eigið fé HS Orku hf. var 5.934 millj. kr. í lok ársins. Eiginfjárhlutfall var 16% en var 54% í ársbyrjun. Í ársbyrjun var eigið fé 19.976 millj. kr. Lækkun eigin fjár skýrist að mestu leyti af skiptingu félagsins og afkomu þess. Áhrif endurmats fastafjármuna til hækkunar á eigin fé HS Orku hf. voru 979 millj. kr.

Í lok árs 2008 uppfyllir félagið ekki kröfur í lánasamningum um eiginfjárhlutfall og rekstrarhlutföll sem veitir heimild til gjaldfellingar. Félagið hefur átt í viðræðum við lánveitendur sem ekki er lokið. Stjórn og framkvæmdastjórn félagsins telja að unnt verði að ljúka viðræðum innan skamms og að niðurstaða þeirra verði félaginu hagfelld.

Horfur um rekstur HS Orku hf. eru góðar að því gefnu að samningar við lánveitendur félagsins um fjármögnun þess náist. Umsvif fara vaxandi og áfram verður unnið að aukinni orkuvinnslu. Unnið verður að rannsóknum á frekari virkjunarkostum og er verið að afla margvíslegra leyfa í því skyni. Stærstu einstöku verkefni eru rannsóknarboranir og annar undirbúningur fyrir nýjar virkjanir.